



Aqqalu C. Jerimiassen
Atassut

UKA 2021/148
19. oktober 2021

Inatsisartut aaliangiiffigisassaattut siunnersuut Naalakkersuisut peqquneqassasut Naalagaaffiup akisussaasuinut atassuteqartoqarnissaannik Kalaallit Nunaanni Pinerluttulerinermut inatsimmi paragraffimik ikkussisoqassasoq, nittartakkatigut atornerluinerup inatsisitigut unioqqutitsinertut isigineqaarnissaanut. Atassuteqarneq UPA 2022 pinnginnerani pisimassaaq.

(Inatsisartunut ilaasortaq Anna Wangenheim, Demokraatit)

“Grooming” ajoraluartumik ullutsinni annertungaartumik nunarsuaq tamakkerlugu atungaaqaaq, tamannalu pillugu taamak ittumik akiuiniarnissamut siunnersuuteqartoqarnera Atassummiitaaq nuannaarutingaarput.

Ukiorpassuarni teknologip ineriartornerani ajoraluartumik meerartatta isumannaannerusumik inissisimanissaannut nittartakkakkut tamat naapittarfiinik pilersitsiortuleruttornermi puigunqarsimaqaagut.

Tassami assersuutitut uani tigulaarilaariaanni, naak toqqaannartumik “grooming”-imut attuumassuteqavinnigikkaluartoq, Tiktok aqquotingalugu amerikarmiu nuisaannartumik imminut aallaalluni toquttoq ajoraluartumik meerartatta nunatsinni amerlangaartut takusimavaat, tupaqqanerminnilu annertuumik puiguikkiussaqarlutik misigisapalaamik.

Inatsimmik pilersitsinissaq toqqammaviatigut tapersersornangaarpoq, tassungalu ilaatilluguttaaq, uagut nammineq angajoqqaajusuguttaaq eqqummaarinnerusariaqarpugut immitsinnut aperissalluta: ilumut pisarsiaqarpa meeqqatta 14-it 15-illuunniit ataallugit ukiullit nittartakkakkut kikkut tamat naapittarfiinik peqartissallugit ammaannartumik?

Akisussaaqataasariaqarpugut!

Taamaattumillu uunga siunnersuummuttaa tapullugu Atassummiit kaammattuutigiumavarput, ataatsimiitsitaliaq suliaqarnissamini “grooming” kisiat piinnarnagu, taamaattorli “Dark web” ilannullugu inatsimmik taputaqartariaqartut. “Dark web” nassuiassangaanni imannak naalisarneqarsinnaavoq; nittartakkakkut imaaliallaannaq malinnaavigineqarsinnaajunnaarluni ingerlatsineq.

Taannalu taaniarneqartarportaaq, nunarsuaq tamakkerlugu anngiortumik arnanik meeqqanillu angallassinikkut aqquutit annersaat.

Kinguaassiutitigut kannguttaattuliortarneq tamatta qaqaguluunniit akuerinngisaannassavarput, meeqqanuuppat, inersimasunuuppat, arnanuuppat angutinuuppalluunniit, akiuiniarnermullu annertunersumut tamatta suli akisussaaffeqaqatigiittuaannartariaqarluta.



Soorlumi siunnersuuteqartup nammineq oqaaseqaatigisamini taagaa; meeqqat pisariaqartitsinerusutut taaneqarsinnaasut innarlerneqaratarsinnaanerminnuttaaq qaninnerusinnaammata.

Tamanna qimarratigisinnaanngilarput, nunarsuaq misigittaattorpassuarnik inoqarpoq uagulluunniit ulluinnarni eqqarsaatigissallugit inorluinnakkatsinnik amiilaarnarluinnartunik.

Maanna ajoraluartumik annertoqaaq, assersuutingalugu Facebookimi allatut atsilaaginnarluni kinaassuseqartuusaarneq atorlugu attaveqaqattaarniartarneq, uukapaatitsillunilumi inussiarnisaartuusaariarluni atoqitigiinniarnermut tunngasunik eqqartuinninniarsarluni pilertarneq. Ukiukinnerusunullu ajoraluartumittaaq tamanna atorlugu attaveqarniartartut pillugit angajoqqaarpasuit Facebookimi mianersoqusillutik siammarterisalersimapput.

Ilaatigummi allaat mianersoqqussutitut siammarterneqartut takusalersimavagut, anaanaasoq panimmi messengeriani allagarsiarisimasai siammarterlugit mianersoqusisoq, inummik qanuunerpa atilimmiik atoqatigiinniarnermut tunngasunik allaqattaarfigineqarsimaneranik. Ila ilumut meerartagut ulorianartorsioqqajaaneroqaat maanna digitalip silarsuaani atuilluarfitsinni.

Taamatut Atassummiit oqaaseqarluta, siunnersuut tapersingaarlugu Ilaqutariinnermut Peqqissutsimullu ataatsimiitsitaliamut innersuupparput.